



Här Fernand Etgen
President vun der Chamber

Lëtzebuerg, den 17. Juli 2023

Här President,

Esou wéi den Artikel 80 vum Chambersreglement et virgesäit, bieden ech Iech, dës parlamentaresch Fro un de Minister fir Mobilitéit an ëffentlech Aarbechte weiderzeleeden.

Eisen Informatiounen no falen aktuell ronn 50% vun de Leit beim éischte praktesche Führerschäinsexamen duerch a kréien zum Deel während der Faart Fale gestallt. Dës Zuele confirméiert de Minister och a senger Äntwert op d'parlamentaresch Fro N°7521 a schwätzt vun engem Taux d'Echec vu 47,5% fir d'Joer 2022.

An deem Kontext wéilt ech folgend Froen un den Här Minister fir Mobilitéit an ëffentlech Aarbechte stellen:

- Wat ass d'Positioun vun der Regierung zu dësem héijen Taux d'Echec?
 - Wéi hunn d'Zuelen iwwert déi läscht 10 Joer evoluéiert?
 - Wéi gedenkt d'Regierung dës Zuelen ze verbessern?
- Kann d'Regierung confirméieren, dass d'Fahrpräiwer de Kandidat Fale stellen?
- Wat kascht de Führerschäin ee Fuerufänger an der Moyenne, wann een den Taux d'Echec mat arechent?
 - Wéi steet Lëtzebuerg do par Rapport zum Ausland?

Här President, ech bieden Iech dës Froen, mat mengem déifste Respekt unzehuelen.

Nancy Arendt ép. Kemp
Deputéiert



LE GOUVERNEMENT
DU GRAND-DUCHÉ DE LUXEMBOURG
Ministère de la Mobilité
et des Travaux publics

Äntwert vum Minister fir Mobilitéit an ëffentlech Aarbechten op d'parlamentaresch Fro n° 8164 vum 18. Juli 2023 vun der Madamm Deputéiert Nancy Arendt.

Déi honorabel Deputéiert stellt sech eng Rei Froen am Zesummenhang mam Taux de Réussite beim Führerschäinsexamen.

Et ass effektiv esou, dass den Taux d'Échec beim praktesche Führerschäinsexame sech an de leschte Jore bei ronn 50% agependelt huet. Dëst ass en Effekt, deen een och an anere Länner feststelle kann. Sou lounge Duerchfallquote fir de praktesche Führerschäinsexame an Däitschland bei ronn 40%, a Frankräich bei ronn 42% an an der Belg bei ronn 45% an der rezenter Vergaangenheet.

Taux d'échec beim Autoführerschäin op 10 Joer

2013	2014	2015	2016	2017	2018	2019	2020	2021	2022
49,8 %	49,5 %	49,6 %	49,9 %	46,7 %	45,1 %	48,8 %	47,5 %	51,1 %	52,5 %

D'Experte erklären sech dëse Phenomen ënnert anerem mat der Verännerter Approche vun de jonke Führerschäinskandidaten zum Führerschäin an der Mobilitéit als Solches. Engersäits huet de Führerschäin bei ville Jonken en anere Stellewäert wéi nach virun 20 Joer, wat mat der verännerte Mobilitéitsgewunnechte (alternativ Mobilitéit oder och de gratis ëffentlechen Transport) ze erklären ass. Dëst féiert awer och dozou, datt déi jonk Chaufferen net méi esou bei den Elteren am Auto de Verkéier ophuele léiere wéi fréier, well si oft net méi op de Verkéier als Bäi- oder Matfuerer oppassen (Smartphone) an esou vill Reflexer an Automatismen net méi hunn oder kennen iert si an eng Fahrschoul kommen an dat dann do eréischt léiere mussen. Dozou kënnt awer och, dass de Verkéier ëmmer méi komplex gëtt a stänneg zouhëlt, aner nei Verkéiersteilnehmer wéi z. B. d'Trottinetten oder och den ëmmer zouhuelende Vëlosverkéier verlaangen de jonke Chaufferen ëmmer méi of.

Fir op dës Entwécklungen ze reagéieren, muss effektiv an Zukunft méi de Fokus an der Ausbildung op de sougenannte "risk awareness" geluecht ginn. Fir insgesamt déi jonk Chaufferen besser op d'Erausforderunge vum moderne Verkéier virzebereeden zu kënnen misst een eventuell bei enger Reform vum Apprentissage driwwer nodenke fir d'Ziel vun den obligatoreschen Stonnen an d'Luucht ze setzen fir esou dann och den Taux d'Échec erof ze kréien.

Wat d'Führerschäinsexamen ugeet, esou ass awer ze betounen, dass d'Examineuren, déi all staatlech agréiert an assermentéiert sinn, kengem Kandidat eng Fal stellen.

Wat d'Käschte fir de Führerschäin ugeet, esou läit den duerchschnëttleche Präis (fir Theorie a 16 Stonne Praxis) bei ronn 1600 Euro, wat awer vu Fahrschoul zu Fahrschoul variéiere kann, well d'Präisser net reglementéiert sinn. Bei engem Échec kommen dann am Schnëtt nach emol ronn 750 Euro dobäi.

Wat d'Ausland ugeet, esou läit laut ADAC de Präis vun engem Autosführerschäin an Däitschland tëschent 2106 a 4456 Euro jee nodeems wéivill Stonnen e muss huele fir den Examen ze packen. An der Belg läit de Führerschäin jee no Quelle bei ronn 1700 Euro an a Frankräich bei ronn 1800 Euro.

Lëtzebuerg, den 11. August 2023.

De Minister fir Mobilitéit an ëffentlech Aarbechten

(s.) François Bausch